



Trest: In da biars cavreuls che han stuiu vegnir sittai giu.

FOTO THOMAS WEHRLI/D. BUNDI



Era quei camutsch ha la survegionza da catscha stuiu liberar da sias peinas cun sittar giu.

Sils fastitgs da tgauns scarponts

Patruns da tgauns ein obligai da tener lur tgauns en suga

DA BERNHARD PETSCHEN

■ **Unviern per unviern vegnan animals selvadis scarpai da tgauns scarponts. Quei capeta buca mo en regiuns turisticas, mobein era els vitgs ed uclauns dallas valladas periferas.** El decuors dil december 2011 ei vegniu communicau al cauredatur dil «Catschadur grischun» *Walter Candreia* ch'in possessur da tgauns enqueri gia igl entir di ses dus tgauns. «Quels ein segir vid scarpas selvaschinas», ha igl informant sincerau al telefon, aschuntond denton immediat: «Schei denton a negin che quella informaziun vegni da mei.»

Quei ei ina episodica che demuossa con virulents ch'il problem ei e che la tema dils observaders d'annunziar tals abus ei gronda perquei ch'ins tema repressalias. Ils biars senuspeschan da tradir ed aschia spuentar in hosp fideivel e solvent ni la finala riscar ina dispeta stentusa culs vischins. Quei che manca ei in avvertiment sincer ed objectiv che effectuescha ina migliur. En quei grau ei quei denton aunc buca da far, in discuors cul possessur dil tgaun ei en scadin cass necessaris e la finala d'avantatg per omisus.

Claudio Spadin: «Deplorablamein buca mo cass singuls»

Claudio Spadin ei survegilader da catscha ed administratur da cavreuls per incumbenza dil cantun. E damai che cunzun cavreuls ein en emprema lingia unfrenda da tgauns ein tals frauds ina part impurtanta da ses rapports. E Spadin conferma:



Quei tgaun scarpont ha il guardiaselvaschina traplau cu el era gest lundervi da perseguitar sia preda.

«Gie, deplorablamein eis ei aschia che biars ignoreschan semplamein tals cass per evitar malemperneivladads cul vischin ni enconuscent. Perquei intervegnin nus magari dis ed jamnas pli tard ch'in tgaun hagi puspei scarpau in cavriel», constatescha Spadin.

Igl ei denton buca ina casualitad, e plirs cavreuls ein vegni scarpai ils davos unviarns, di Spadin vinavon sin damonda. Tenor il survegilader da catscha ston ins tener quen che cavreuls setegnan si igl unviern en special en la vischinonza da vitgs

ed uclauns e duront unviarns cun bia neiv sco uonn engartan ins magari era cavreuls en streglias e vias ch'ei vegnidadas rumidas dil criecc da neiv. «Duront il criu unviern ei la selvaschina spossada e buca pli habla da scappar dil tgaun.» Deplorabels ei era il fatg che la selvaschina vegn buca adina exnum scarpada dil tgaun, mobein vegn catschada a malura da quel.

Perquei eis ei indispensabel ch'il tgaun vegni prius en cadeina dil possessur. Vinavon ei vegniu constatad che gest plirs cavreuls ein vegni scarpai e van

alla malura en il territori damaneivel da casas da vacanzas, pia gest leu nua ch'il turrisein ei da casa. «Adina puspei intervegnin nus ch'ils hospis da vacanzas laian ir la damaun il tgaun giuado el liber senza survegionza per che quel hagi in tec moviment», declara Spadin.

«Biars possessurs van cun lur tgaun en cadeina ed ein cunscients e prendan serius lur responsablada», accentuescha Spadin. Mo ina pintga procentuala da persunas senza senn da responsablada effectueschi la finala tragedias ch'ins

savess evitar. Bein savens capeta quei era leu nua che la selvaschina vegn pervesida ni catta maglia el cumpost cun rufids da cuschina.

Possessurs da tgauns senza senn da responsablada vegnan tgisai

«Miu tgaun morda buca» e «miu tgaun scarpa segir buca animals selvadis» vegn magari argumentad cun tutta perschusiun ed arroganza da possessurs da tgauns.

Che quei sa esser ina conclusiun falsa documenteschan dus cass ch'ei veramein capitai. El decuors digl unviern 2011 ein buca meins che 16 cavreuls vegni scarpai da tgauns sulettamein ella regiun d'Engiadina Aulta denter Bever e Silvaplana.

Il medem unviern han sis cavreuls stuiu schar la veta pervia dalla persecuziun entras tgauns el territori da Tavau. Buca d'emblidar l'aula cefra nera, perquei ch'ils animals anflai ein tuttavia buca tut ils animals scarpai en quellas duas regiuns. Mo da lezs mauncan ils mussaments.

Plinavon eis ei aunc remarcabel da saver: Entgins possessurs da tgauns han buca saviu snegar ni selavar ora che gest lur tgaun hagi buca scarpau ils animals anflai. Damai ch'ins ha denton giu clars indezis ein ils culpents lu era vegni tgisai e castigai sin fundament da clars mussaments. E la finala ston ins saver: Tgauns che s'allontaneschon senza survegionza da lur patruns e scarpau repetidamein selvaschina e vegnan traplai «in flagranti» san vegnir sittai giu.